

PLOANIES SAN MARTIN Y LUNGIARÜ

La Uniun dles Ēres Catoliches de nosc decanat inviëia duc i geniturs che á n pice möt o na picia möta da batié, pers che aspeta, toc y totes de nosc decanat ala preparaziun dl Bato la sabeda al 01 de merz dales 15.00 a les 17.00 a Badia, tla ciasa Runcher. Deboriada orunse aprofondí l'importanza de chësc sacramënt, presenté le ritus y splighé i simboi dl Bato. Prëibel prenotesse pro Lucia al nr 334 32 00 396.

SAN MARTIN

Invit ai Seniors y les Seniores da San Martin y Antermëia da gní a tó pert al iade por sanc dl pröm vëndres de merz a Spinges, en vëndres ai 07 de merz. I s'abinun dales 8.30 sön plaza dl païsc da San Martin, por jí ia deboriada cun i auti privac. Dales 10.00 sarál mëssa ia Spinges cun don Marco y dedô junse a marëna tl hotel Roger. Le cost é de 20 euro porom. Prëibel prenotesse cina la domënia ai 02 de merz pro Leo 348 40 96 351. Gnide tröc!

Le Grup Jonil di Stödafuch da San Martin mët tosc indô man cun süa ativité. Düc i mituns da 12 agn insö o che i complësc en chësc ann y ess interes da tó pert pó s'anunzié pro Dennis 346 95 70 357.

LUNGIARÜ

I Seniors y le Seniores da Lungiarü é dër bel inviá/des da gni en jöbia grassa ai 27 de forá dales 14.00 tl salf dla scora a na picia festa da carnescé cun musiga da bal, crafuns y val' da bëre.

Le Consëi de formaziun de San Martin inviëia ala sentada generala en lönesc, 24 de forá, dales 20.00, tl Istitut Ladin Micurá de Rü.

I Consëis de formaziun da San Martin, La Val y Badia lascia alsavëi che an pó cialé le video de sensibilisaziun „L'alcol pó ester bun... da fá de bi dagns“ tla mediateca sön la plata internet www.micura.it.

Le Museum Ladin Ciastel de Tor/Aziënda Museums Provinziai scri fora: 1 post por le sorvisc da puzené, 16 ores al'edema, da mez aurí 2025 ai 30 de novëmber 2025, 6 dis al'edema dal lönesc ala sabeda; termo por les domandes 17 de merz 2025. Recuisic ghirá: avëi stlüt jö la scora d'oblianza. Por informaziuns plü menüdes scriede a info@museumladin.it, tel. 0474 524020. Menede les domandes cun curriculum vitæ a info@museumladin.it o dédeles jö personalmënter tl Museum Ladin, str. Tor 65, 39030 San Martin de Tor, ti orars de daurida di ofizi.

Les iscriziuns ales Scores de musiga dla Provinzia vëgn fates "online" dal 01 de merz cina ai 31 de merz 2025 tres le sorvisc dl'aministrasiun provinziala "myCivis" <https://civis.bz.it/einschreibung-musikschule>. L'azes al sorvisc online vá tres SPID o CIE (cherta d'identité eletrónica). Informaziuns plü avisa tl secretariat dla Scora de Musiga a La Ila: Tel. 0471/847748 o sot a <https://deutsche-bildung.provinz.bz.it/de/musikschulen>.



unitepastorala.org

Plata dles Ploanies San Martin y Lungiarü

ploan siur Klaus Sottsas 344 15 54 055 - klsottsas@rolmail.net
redaziun: anton.gasser@rolmail.net - 348 27 44 517 / 0474 523194

23.02. - 02.03.25 n. 13

termo por comunicaziuns: jöbia, dales 20.00

7ª Domënia ia por l'ann C

Vangele do san Lúca 17, 20-26

Gejù ti dit â sü discepui: A os, ch'i m'ascutëis pro, ves diji: Oredi bun a üsc nemisc; fajedi de bëgn a chi che ves à le sënn. Benedide chi che ves maledësc; periede por chi che ves maltrata. A chël che te bat sön öna na massëdla tëgni incé ia l'atra, y a chël che te tol le mantel lasci incé la cíamëja. Dài a vignun che te präia; y sce un te tol val', no le ghiré derevers. Cí ch'i ves aspetëis da d'atri, chël fajedi incé os a d'ëi.


Sëise misericordiusc, sciöche osc Pere é misericordius! No iudichede, spo ne gnarëise gnanca os iudicà. No condanede, spo ne gnarëise gnanca os condanà. Pordenëse, spo ves gnaral pordenè. Dede, spo ves gnaral dè incé a os. Na bona mosöra, plëna, colma, suraciariada, ves gnaral juté tl gremo; deache cun la mosöra, cun chëra che os mosorëis fora, ves gnaral mosoré fora incé a os.

*Chësc é le program por la vita de nos porsones söla tera, sc'i orun ti jí do a Gejú.
Al é laite döt le contignü dla sapiënza dl pordicadú da Nazaret.
Al é chëstes les regoles fundamentales, sc'i orun che nosta vita garetes.
Al nes dá na mosöra scëmpla, mo dër ria da mosoré nosc comportamënt.
Tla mascinaria de nosta vita, te nosc vire deboriada,
sunse tles ciafes de nostes reaziuns sentimentales nia saurides da controlé.
Al ne se resta porchël nia d'ater, co porvé almanco vigni tant da fá varëi tla vita chësta bunté fora de mosöra orüda da Chël Bel Dí
y chësta süa misericordia che ne ciara nia de se instësc.
Y porchël da perié ch'i sunse bugn - almanco vigni tant - da le fá.*

T.D.



EDEMA - C	SAN MARTIN	LUNGIARÜ
23.02.25 7^a Domènia ia por l'ann C	9.30 Corona (<i>don Marco</i>) 10.00 Gran Mëssa por la comunità ++ Angelina y Pio Baldissera, dl ann ++ Fonjo y Dolfo Unterweger, dl ann + Hannele Pedevilla Trebo, dl ann 14.00 Bato de Jan Clara de Ivo y Valentina Barbolini	7.50 Corona (<i>don Marco</i>) 8.15 Gran Mëssa por la comunità + Paul Pezzei ++ Loise y Iarone Frenademez por les püres Animes + Paolo Dapoz
24.02.25 Lönesc <i>Matia apostul, Adela</i>		
25.02.25 Dedolönesc <i>Walburga, Adeltrude</i>	<i>degöna mëssa</i>	
26.02.25 Dedemesaledema <i>Ulrich, Matilda</i>		<i>degöna mëssa</i>
27.02.25 Jöbia - Jöbia Grassa <i>Iulian, Gabriel</i>		
28.02.25 Vëndres <i>Roman, Silvana</i>	18.30 Adoraziun chîta 19.00 Adoraziun deboriada	
01.03.25 Sabeda <i>Albin, Davide</i>	18.30 Mëssa prefestia + Franz Planatscher + Giovanni Unterweger + Rita Costabiei, dl ann	
02.03.25 8^a Domènia ia por l'ann C	9.30 Corona por vocaziuns (<i>don Marco</i>) 10.00 Gran Mëssa por la comunità + Teresa Pedevilla Flöss, dl ann de rengr. y en onur de Sant Antone a d'intenziun	7.50 Corona 8.15 Gran Mëssa por la comunità dl ann + Serafin Clara dl ann + Johanna Schanung + Albert Daverda dl ann + Oliva Clara Irschara ++ Giovanni y Maria Dapoz



*La regola vedla:
 "Sciöche tö cun me,
 insciö iö cun te!"*

*La regola nöia:
 "Sciöche Chël Bel Dî cun me,
 insciö dessi iö ester cun i atri!"*

*Dal vangele da incö
 aldi iö fora l'invit:
 Ciara sciöche Idî te trata
 y impara da traté i atri
 avisa insciö.*

*Chël, che é bun da odèi
 tan tröp che Idî nes scinca,
 á tan tröp,
 ch'al n'á nia plü bria
 da mosoré y da cumpedé
 denanco scinché.*

*Sce chësc funzionëia ince
 a nivel dla politica mondiala?
 Chësc é ri da dí;
 mo al ne dess nia nes impedí
 da mëte man te nosc pice monn
 da tó sö l'invit de Gejú:
 Oredi bun a üsc nemisc!*